


## JESUS ANG PULONG



### Ang Matun-an Nimo Sa Sini Nga Leksyon

Ang pagpahayag sang Dios sang Iya kaugalingon sa kay Jesus

Ang ugali sang Dios

Ang balatyagon, hunahuna, kag plano sang Dios

Ang gahum kag kabubot-on sang Dios

Ang Mga Ngalan Sang Dios Ginpaathag sa kay Jesus  
Ako Amo

## Ang Pagpahayag sang Dios sang Iya Kaugalingon sa kay Jesus

Nagagamit kita sang mga tinaga sa pagpahayag sang mga panghunahuna, sa pagpahibalo sa iban sang aton batyagon, handum, kag kabubot-on. Ang mga katawhan nakakilala sa aton kag nakahangop sa aton paagi sa mga tinaga nga ginapamulong naton. Ang aton mga tinaga nagapahayag sang aton ugali.

Si Jesus ginatawag nga ang Pulong. Ang Dios nagpahayag sang Iya kaugalingon sa aton paagi kay Jesus. Si Jesus wala lamang maghatag sang mensahe sang Dios sa aton sa Iya mga ginatudlo, Sia misino ang mensahe sang Dios sa aton.

### Ang Ugali sang Dios

Ang Dios espiritu. Indi naton Sia makita, mabatian, kag mabatyagan paagi sa aton mga sentido, Niyan, paano naton Sia makilala? Paano ang maluya, makasasala nga tawo makahangop sang gamhanan sa tanan, himpit, indi makita nga Dios? Si Jesus ang sabat. Ang Dios ginapahayag sa aton ni Jesus paagi sa tawhanon nga personalidad. Ano ang katulad sang Dios? Mahibaloan naton paagi sa pagtulok kay Jesus nga Iya Anak.

**Juan 14:9.** Ang nakakita sa akon nakakita sa Amay.

**Juan 1:18.** Wala gid sing tawo nga nakakita sa Dios; ang bugtong nga Anak, nga yara sa sabak sang Amay, nagpahayag sia sa Iya.

**Mga Taga Colosas 1:15.** Sia amo ang larawan sang dimakita nga Dios.


Ang Dios naghambal sa mga paagi, apang ang pinakamaathag nga pagpahayag sang Iya ugali makita sa Iya Anak — ang buhi nga Pulong sang Dios. Ang Dios nagapakighambal sa aton karon santang nagabasa kita nahanungod kay Jesus. Ang kabuhi, bulohaton, kag mga ginatudlo ni Jesus tanan nagapahayag sang Dios sa mga inagihan sang tawo, sa pulong nga aton mahangpan.

**Mga Hebreo 1:1-3.** Ang Dios sa dumaan nga tion naghambal sa aton mga ginikanan paagi sa mga manalagna sa madamo kag sarisari nga bagay; apang sa sining ulihi nga mga adlaw naghambal sia sa aton paagi sa Anak . . . Sia ang nagapabanaag sang himaya sang Dios kay nagadala sang larawan gid sang iya kinaugali.

**Juan 1:1, 4.** Sa ginsugoran amo ang Pulong, kag ang Pulong kaupod sa Dios, kag ang Pulong Dios; Kag ang Pulong nangin-unod kag nagpuyo sa tunga naton, puno sang bugay kag kamatuoran; nakita naton ang iya himaya nga iya sang bugtong nga Anak sang Amay.

Wala lamang magtudlo si Jesus sa mga katawhan nahanungod sa Dios; kundi nga ginpahayag sa Iya kabuhi ang ugali sang Dios. Naghambal Sia sang pagkabalaan, pagkamaayo, kaalam, katarungan, kaluoy, gahum, kag gugma sang Dios. Nakita sang mga katawhan ining mga kinaiya sa kay Jesus. Ginbantala Niya ang pinakamataas nga talaksan moral nga nahibaloan sang Dios. Nakita sang mga katawhan ining mga kinaiya sa kay Jesus. Ginbantala Niya ang pinakamataas nga talakasan moral nga nahibaloan sang kalibutan kag nagkabuhi Sia suno sa mga talaksan nga ini. Ang kaalam nga makita sa Iya mga ginatudlo sa gihapon nagapatingala sang kalibutan. Sia ang gugma sang Dios nga napahayag samtang nagapangalagad Sia sa tawhanon nga mga kinahanglanon kag ginhatag ang Iya kabuhi para sa iban.

Aton nga makita sa krus diin napatay si Jesus para sa aton mga sala ang pinakamaathag nga pagpahayag sang katarungan kag gugma sang Dios. Ang katarungan sang Dios nagakinahanglan sang silot nga kamatayon para sa sala. Ang paghigugma sang Dios para sa makasasala amo ang nagtulod sa Iya sa pag-antos sang kamatayon sa bahin sang makasasala. Ang Iya paghigugma amo ang



nagtulod sa Iya nga magpa-  
ngamuyo para sa kapatawa-  
ran sadtong mga naglansang  
sa Iya. Daw ano nga gugma!  
Daw ano ka makatilingala  
ang aton Dios!

### Buhata Ini

1. Ano ang titulo nga gingamit ni Juan kay Je-  
sus sa Juan 1:1, 4?  
... a) Ang Kordero sang Dios  
... b) Ang buhi nga Pulong  
... k) Ang Pulong
2. Suno sa Mga Hebreo 1:1–3 sa ano nga paagi  
nagapakighambal ang Dios sa aton karon?  
... a) Paagi sa Iya Anak  
... b) Paagi sa mga manalagna  
... k) Paagi sa kinaiya
3. Ano nga sari sang talaksan moral ang ginban-  
tala ni Jesus kag nangin sulondan sang Iya  
kabuhi?  
... a) Yadtong mga ordinaryo sa Iya kapana-  
hunan  
... b) Ang pinakamataas nga nahibaloan sang  
kalibutan  
... k) Bag-o nga moralidad nga maayo para  
sa isa ka kahigayunan.
4. Sa diin kita makakita sang pinakamaathag nga  
pagpahayag sang katarungan kag gugma sang  
Dios?  
... a) Sa pangamuyo sang Ginoo  
... b) Sa wali sa Bukid  
... k) Sa krus

**Mga balatyagon, mga hunahuna, kag mga plano sang Dios**

Ginapahayag ni Jesus ang mga balatyagon, mga hunahuna, kag mga plano sang Dios sa Iya mga ginatudlo kag sa Iya persona. Isa ka daku nga Manunodlo si Jesus apang nagsiling Sia:

**Juan 8:28.** . . . Ako wala nagahimo sing bisan ano sa akon kaugalingon nga pagbulot-an, kundi suno sa gintudlo sa akon sang Amay ginapamulong ko ining mga butang.

**Juan 15:15.** . . . Ang tanan nga akon nabatian sa akon Amay napakilala ko sa inyo.

Niyan, masaligan naton, ang mga ginatudlo ni Jesus sa mga ebanghelyo subong nga isa ka matuod nga pagpahayag sang Dios kag sang Iya kamatuoran. Makita naton ang Dios subong nga labing maalam, mahigugmaon nga Amay sa langit nga malulo nga nagakabalaka para sa Iya mga kaanakan. Ginkaughtan Niya ang sala kag ang pagpakunokuno apang ginhigugma Niya ang makasasala. Ginsugiran Niya kita kon paano kita maluwas kag ginahatagan kita sang mga pagsulondan para sa malipayon nga kabuhi. Magahandum Sia nga ang nagtalikod Niya nga mga kaanakan magbiya sa ila mga sala kag magpanumbalik sa Iya. Ginpahibalo Niya kita nahanungod sang tumalagsahon kag makatilingala nga kabuhi nga Iya ginaaman para sa aton sa nagapadayon Niya nga ginaharian. Makita naton ining mga kamatuoran sa nasulat nga Pulong sang Dios.

Si Jesus, ang buhi nga Pulong, nagpahayag sang mga balatyagon sang Dios. Sa Iya, ang Dios naghibi bangod sang kasubo sang Iya mga abyan, sang pag-antos sang

mga katawhan, kag sang pagkadimatinuohon sang isa ka siyudad nga nagsikway sa Iya kag nagapadulong sa kalaglagan. Ang kaakig sang Dios nagdabdab batok sa kahambogan, pagpakunokuno kag sa pagpanguwarta paagi sa relihiyon. Natandog ang kaluoy sang Dios samtang ginatulok Niya ang mga katawhan nga nadula sa sala kag katulad sang karnero nga wala sing manugpahalab. Ginpahibalo sang Dios ang mga katawhan nga buot Niya nga magmalipayon sila kag hilway sa mga balatian, sala, silot sang sala kag mga kahadlok.

### Buhata Ini

5. Ano ang balatyagon (kasubo, kaakig, kalipay, pagpatumbaya, ukon kaluoy) nga ginpahayag ni Jesus sa
  - a) Pagpanguwarta sa relihiyon? . . . . .
  - b) kahambogan kag pagpakunokuno? . . .
  - k) pagkadimatinuohon kag pagsikway? . . . .
  - d) mga pag-antos sang mga katawhan? . . . . .
  - e) kasubo sang Iya mga abyan? . . . . .
6. *Hunahunaa*: Ano ang ginabatyag ni Jesus kon magtulok Sia sa imo kabuhi?

### Gahum kag kabubot-on sang Dios

Ginpakita ni Jesus sa aton kon ano ang buot sang Dios kag ang gahum sang Dios sa pagpatuman sang Iya katuyoan. Ang pagkamatinumanon ni Jesus sa Dios kag ang paghiusa sa Iya nagapakita sa aton sang sari sang kabuhi nga buot sang Dios nga maangkon naton. Ang mga milagro nga ginbuhat ni Jesus tanan pagpahayag sang gahum sang Dios kag sang Iya handum sa pagbulig sa mga katawhan, bisan ano man ang ila kinahanglanon. Si Jesus nagsiling nga nagkari Sia sa pagbuhat sang kabubut-on sang Amay, kag nga ginbuhat Niya ang mga bulohaton sang Iya Amay. Nagapamatuod ini nga buot sang Dios nga ayuhon kita, patawaron kita, kag mahimunan ang tanan naton nga mga kinahanglanon karon.

**Juan 5:36.** . . . Ang mga bulohaton nga ginhatag sa akon sang Amay nga tumanon, amo ang bulohaton nga akon ginahimo, nagasaksi nahanungod sa akon nga ang Amay nagpadala sa akon.

**1 Mga Taga Corinto 1:24.** . . . Si Cristo amo ang gahum sang Dios kag kaalam sang Dios.

**Buhata Ini**

7. Sauloha ang 1 Mga Taga Corinto 1:24.

8. Ang lubos nga pagkamatinumanon ni Jesus kag ang Iya paghiusa sa Dios nagapahayag sang

. . . a) talaksan sang Dios para sa aton kabuhi.

. . . b) gahum sang Dios sa pagbulig sadtong mga nagtugyan sang ila kabuhi sa Iya.

. . . k) aton kapaslawan sa pagsunod sa talaksan sang Dios.

. . . d) pagkinahanglan naton sang gahum sang Dios sa pagtuman sang Iya kabubot-on

. . . e) tanan nga yera sa ibabaw.

9. Ginpakita ni Jesus sa aton nga ang Dios makahimo kag buot nga:

a) . . . . .ang masakiton.

b) . . . . .ang mga makasasala.

k) . . . . .ang mga kabuhi.

d) . . . ang tanan naton nga mga kinahanglanon.

10. *Hunahunaa:* Ano ang buot sang Dios nga buhaton para sa imo? Tugotan bala nimo Sia? Usisaa ang butang sa ibabaw nga nabuhat na sang Dios para sa imo. Butangi sang x ang mga butang nga buot mo nga pagabuhaton sang Dios para sa imo karon.

## Ang Mga Ngalan sang Dios Ginpaathag sa kay Jesus

Sa Biblia makakita kita sang madamo nga ngalan para sa Dios. Si Jesus ang Pulong nagabulig sa aton sa paghangop sang mga ngalan nga ini bangod kay Sia ang matuod nga pagpahayag sang Dios.


### Ako Amo

Sang si Moises gintawag sang Dios agud pangulohan ang Iya mga katawhan, si Moises nagpamangkot sang Iya ngalan. Ang Dios nagsabat: 'Ako Amo Ako.' Ginhambalan Niya si Moises nga sugiran ang mga katawhan nga si *Amo Ako* ang nagpadala sa iya. Ang ngalan nga ini nagsugid sa aton nga ang Dios wala sing ginakamunuan kag wala sing katapusan, wala nagabaylo, kag yara sa tanan nga tion. Wala sing paglimbong sa Iya. Sia ang kon ano Sia kag ginabuhat kon ano ang ginatuyo Niya nga pagabuhaton. Masaligan naton Sia.

Apang ano gid bala ang Dios? Ano ang pagabuhaton Niya? Masabat ni Jesus ining mga pamangkot sa Iya wali nga nasulat sa Ebanghelyo ni Juan. Walo ka beses nga gingamit Niya ang ngalan sang Dios nga *Ako Amo*, sa Iya kaugalingon. Makaisa nga gingamit Niya ini sa paglaragway sang wala sing ginkamunuan kag wala sing katapusan Niya nga kinaiya, sa pagsuigd sa aton nga yara na Sia sang wala pa si Abraham. Gingamit ni Jesus ining ngalan sang Dios sa iban nga mga tion sa pagpaathag sang kinaiya sang Dios kag subong man sang Iyasa pagpakita kon ano ang ginahimo sang Dios sadtong mga nagapalapit sa Iya. Ang daku nga *Amo Ako* magasugata sang tanan naton nga mga kinahanglanon.

- 1) *\*Ako amo* ang tinapay nga nagahatag sang kabuhi.\* Juan 6:35.
- 2) *\*Ako amo* ang kapawa sa kalibutan.\* Juan 8:12.
- 3) *\*Sa wala pa matawo si Abraham, amo na ako.\** Juan 8:58.





- 4) \*Ako amo ang ganhaan.\* Juan 10:9
- 5) \*Ako amo ang maayong manugpahalab.\* Juan 10:11.
6. \*Ako amo ang pagkabanhaw kag ang kabuhi.\*  
Juan 11:25.
7. \*Ako amo ang dalan, kag ang kamatuoran, kag ang kabuhi.\* Juan 14:6.
8. \*Ako amo ang matuod nga puno sang ubas.\*  
Juan 15:1.

### Buhata Ini


11. Ngaa nga malahalon ang *Ako amo* nga mga bersikulo?
  - .. a) Ginapaathag nila ang ngalan sang Dios.
  - .. b) Ginapakita nila sa aton ang kinaiya sang Dios. ....
  - .. k) Ginapakita nila kon ano si Jesus sa aton.
  - .. d) Tanan nga yara sa ibabaw.
12. *Hunahunaa:* Tun-i ang mga *Ako amo* ni Jesus. Sia gid bala ang tanan nga ini sa imo? Markahi ang tagsa ka kaangtanan nga yara sa listahan nga buot mo nga mangin imo kay Jesus. Ano ang mga kinahanglanon nga mahimon-an ni Jesus para sa imo suno sa sining 'Ako amo' nga mga titulo? Pasalamat ang Dios bangod sang kon ano Sia.

## Jehovah

Ang Jehovah nagakahulogan sang *walay ginkamunoan kag walay katapusan ukon ang Isa nga naghuntad sing kinaugalingon*. Ini nga ngalan ginasugpon sa iban nga mga tinaga sa paghimo sang iban nga mga ngalan nga may daku nga kahulogan. Tanan ini ginasandig sa personal nga pagpahayag sang Dios kag nagasugid kon si sin-o Sia kag kon ano ang Iya ginabuhay para sa mga katawhan. Si Jesus — ang Pulong nga nagapahayag sang Dios sa aton — nagalaragway sang kamatuoran sining mga ngalan sang Dios.

1. *Jehovah-jireh* — ang Dios magaan.

**Genesis 22:8.** Si Abraham nagsiling, ang Dios iya magaan sang kordero sa halad-nga-sinunog, anak ko.



**1 Pedro 1:18–20.** Kamo nakahibalo nga gintubos kamo . . . sang dugo ni Kristo, subong sang kordero nga walay kasawayan kag walay dagta. Sia gintangdo sa wala pa ang pagpasad sang kalibutan...

Si Jesus amo ang kordero nga gin-aman sang Dios sa pagkuha sang silot sang aton sala kag mapatay sa aton bahin.

2. *Jehovah-ropheka* — ang Ginuo aton Manug-ayo.

**Exodo 15:26.** Ako amo ang Ginuo nga manug-ayo sa inyo.




**Mateo 8:16.** Sadtong kahaponon nagdala sila sa iya sang madamo nga may mga yawa; kag ginsubol niya ang mga espiritu sa isa ka pulong, kag gin-ayo niya ang tanan nga nagamasakit.

Si Jesus, ang Daku nga Manugbulong, nagaayo sang lawas, hunahuna, tagipusoon, kag buong nga espiritu.

3. *Jehovah-shalom* — ang Ginuo aton Paghidait.  
**Mga Hukom 6:24.** Niyan nagtukod didto si Gideon sing halaran sa Ginuo, kag ginhingalan ini, ang Ginuo Paghidait.

**Juan 14:23, 27.** Si Jesus nagsabat . . . \*Ang paghidait ginabilin ko sa inyo, ang akon paghidait ginahatag ko sa inyo . . . \*



Si Jesus naghatag sa aton sang paghidait sa sulod sang aton tagipusoon nga wala nagasandig sa mga kahimtangan — paghidait sa Dios, paghidait sa aton kaugalingon, kag paghidait sa iban.

4. *Jehovah-rohi* — ang Ginuo akon Manugpahalab.  
**Salmo 23:1.** Ang Ginuo akon Manugpahalab, wala sing makulang sa akon . . .

**Juan 10:7, 11.** Gani si Jesus nagsiling . . . \*Ako ang maayong manugpahalab. Ang nagahatag sang iya kabuhi tungod sa mga karnero.\*



Si Jesus — ang Maayong Manugpahalab — napatay sa pagluwas sa aton kag nagakabuhi karon sa pagtatap sang tanan nga nagasunod sa Iya.

5. *Jehovah-tsidkenu* — ang Ginuo aton Pagkamarung.

**Jeremias 23:6.** . . . kag amo ini ang ngalan nga itawag sa iya: **ANG GINUO ATON PAGKAMARUNG.**

**2 Mga Taga Corinto 5:21.** Sia nga wala maka-kilala sing sala ginhimo niya nga mangin sala tungod sa aton, agud nga kita mangin pagkamarung sang Dios sa iya.



May isa lamang ka paagi agud maka-angkon sang matinlo nga tagipusoon kag kabuhi. Maangkon naton ang husto nga sari sang kabuhi kag husto nga kaangtanan sa Ginuo paagi lamang sa pagpakig-angot kay Jesus. Sia ang aton pagkamatarung.

6. *Jehovah-shammah* – ang Ginuo yara sa tanan nga tion.

**Ezequiel 48:35**. . . . ang Ginuo didto.



**Mateo 1:23**. \*Yari karon, ang isa ka ulay magapanamkon kag magaanak sing lalaki, kag tawgon ang iya ngalan Emmanuel (nga kon sayuron, 'Ang Dios kaupod naton').

7. *Jehovah-nissi* – ang Ginuo aton Hayahay.

**Exodo 17:15**. Kag si Moises nagpatindog sing halaran kag ginhingalanan niya ini, ang Ginuo akon hayahay.

**Juan 16:33**. . . . \*Sa kalibutan may kangitngitan kamo, apang magpakalig-on kamo, nadaug ko ang kalibutan!



Nagakahulogan ini nga si Jesus amo ang aton Pangulo, aton Kadalag-an, kag Kusog, Magamakusog kag ma dinaugon kita sa adlaw-adlaw nga pagpakig-away sa kabuhi kaupod Niya.

Ano ang kahulogan sining mga ngalan sa imo? Ang kahulogan sini amo nga kon naangkon nimo si Jesus nga imo Manluluwas, ang Ginuo magaan para sa imo. Ang

Ginuo magaayo sa imo. Ang Ginuo amo ang imo Paghidait Ang Ginuo amo ang imo Pagkamatarung, yara kaupod nimo, kag kadalag-an nimo. Amo ini tanan si Jesus sa imo, kon itugyan mo ang imo kabuhi sa Iya, magtuad sang imo mga sala kag batunon Sia sa imo kabuhi.

### Buhata Ini

13. Ihatag ang kahulogan sining mga ngalan:

a) Jehovah-jireh . . . . .

b) Jehovah-rophekah . . . . .

k) Jehovah-shalom. . . . .

d) Jehovah-rohi. . . . .

e) Jehovah-tsidkenu. . . . .

g) Jehovah-shammah . . . . .

h) Jehovah-nissi . . . . .

14. *Hunahunaa:* Tun-i ang tagsa ka mga ngalan nga ini nga may kaangtanan sa imo personal nga inagihan. Napahayag bala ni Jesus ang Dios sa imo subong nga Manug-aman, Manug-ayo, kag iban pa? Markahi ang kada isa nga imo naagihan subong nga personal nga pagpahayag sang Dios. Butangi sang x yadtong buot nimo nga maagihan karon. Pangamuyoi ini, nga nagapasalamat sa Dios bangod sang pagpahayag Niya sa imo sang Iya kaugalingon sa kay Jesus.

15. Usisaa ang imo mga sabat kag sulati ang imo rekord sang bumolutho para sa leksyon 5.

## Leksyon 5 – Mga Sabat

Ang mga pamangkot nagakinahanglan sang 22 ka mga sabat. Kon may husto ikaw nga sabat halin sa 20 tubtob sa 22, labing maayo; 16 tubtob sa 19, maayo; 11 tubtob sa 15, kasarangan. Kon manubo sa 11 ang husto mo nga sabat, basaha liwat ang leksyon agud mahibaloan mo sing maayo.

1. k) Ang Pulong.
2. a) Paagi sa Iya Anak.
3. b) Ang pinakamataas nga nahibaloan sang kalibutan.
4. k) Sa krus.
5. a) kaakig, b) kaakig, k) kasubo, kaluoy, d) kasubo, kaluoy e) kasubo, kaluoy
8. e) Tanan nga yara sa ibabaw.
9. a) ayuhon, b) patawaron, k) bag-uhon, d) mahimun-an
11. d) Tanan nga yara sa ibabaw.
13. a) Jehovah-jireh – ang Dios magaan  
 b) Jehovah-rephekah – ang Ginuo aton Manug-ayo  
 k) Jehovah-shalom – ang Ginuo aton Paghidait  
 d) Jehovah-rohi – ang Ginuo aton Manugpahalab  
 e) Jehovah-tsidkenu – ang Ginuo aton Pagkamatung  
 g) Jehovah-shammah – ang Ginuo yara sa tanan nga tion  
 h) Jehovah-nissi – ang Ginuo aton Hayahay

Kadamuon sang husto nga sabat. . . . . Grado . . . . .

Karon sulati ang imo rekord sang bumolutho para sa Leksyon 5.